

03 NOV 2000

Mahathir-Islam

PENYATUAN ISLAM PENTING UNTUK HADAPI GLOBALISASI

AKUALA LUMPUR, 3 Nov (Bernama) -- Datuk Seri Dr Mahathir Mohamad berkata pemahaman dan penyatuan antara sesama Islam amat penting untuk mengembalikan kebenaran Islam terutama dalam menghadapi cabaran globalisasi.

Perdana Menteri berkata tanpa pemahaman dan kesepakatan antara umat Islam tentunya perselisihan faham dan kemunduran akan terus melanda ummah.

"Sekarang ini telah dibuktikan melalui pertalian beberapa peristiwa bahawa atas kepentingan tertentu, kemurnian dan kesyumulan agama Islam telah disalahgunakan mengikut selera dan kepentingan masing-masing," katanya dalam buku cenderamata Multaqa Ulama Malaysia Ke-5 di sini hari ini.

Beliau berkata perubahan Islam semasa ditafsirkan untuk memenuhi kehendak individu atau pengikutnya dan bukan memenuhi tuntutan Allah dan Rasul.

Katanya atas pelbagai alasan dan kepentingan tertentu tafsiran yang dibuat jelas menjadikannya semakin mengelirukan dan menggelisahkan orang aramai.

Dr Mahathir berkata kelemahan sesetengah orang Islam ialah mereka amat mudah terpengaruh dengan slogan dan apa sahaja yang dibuat atas nama Islam.

"Apabila mereka sudah meyakini atau percaya, mereka kerap menjadi pelampau dan fanatik terhadap kepercayaan ini sehingga sukar kembali ke jalan benar yang dituntut oleh agama," katanya.

Beliau berkata fahaman yang melampau dalam apa bentuk sekali pun bukanlah merupakan sesuatu yang dianjurkan oleh Islam.

-- BERNAMA

MNY GM NMO